

**INATSIARTUT
OMBUDSMANDIATA
UKIUMOORTUMIK
NALUNAARUTAA
2002**

4. Soraarsitsinissaq sioqqullugu suliami illua'tungiusup isumaanik tusarniaaneq naammanngitsoq kiisalu tunngavilersuineq suliamilu uppernarsaasersuineq amigaatilik.

Kommunip tjenestemanditut sulineramik misilitsittoq soraarsissimavaa, soraarsitaasoq soraarsitsinermut oqaaseqaammik saq-qummiussinissaanut periarfissinnagu.

Ombudsmandi isumaqarpoq soraarsitsineq sioqqullugu suliami peqataasumik tusarniaaviginninnissamik piumasaqaatinik kommunu nammassinnissimannngitsoq, amigaataasorlu soraarsinnetartup soqutigisaqaqatigiiffimmut ilaasortaaffigisaanut tunngavilersuummik ilaannakuusumik kommunip nassitsineragut iluarsiivigineqarsimannngitsoq.

Ombudsmandilu aamma isumaqarpoq kommunip soraarsitsinermut tunngavilersuutaa amigaateqartoq, soraarsitsinermummi pineqartumut nassuiaativittut pissuseqanngimmat.

Kiisalu Ombudsmandi isumaqarpoq kommunip suliami uppernarsaasersuina amigaateqartoq. (J. nr. 11.10.21.01/059-01)

A-p saaffiginnissutaa 6. juni 2001-imi tiguara, taassumalu soraarsinnetalersaarnini naammagittaalliuutiginiarpaa.

A 19. juli 2001-imi nalunaarpoq sulisitsisuminit, K Kommunimit, nalunaarummik massakkut tigusaqarsimalluni, tassalu suliffimminit soraassoq. Tamaattumik K Kommunip imminek soraarsitsinera tamatumunngalu atatillugu kommunip suliamik suliarinninnera A-p naammagittaalliuutiginiarpaa.

K Kommunini pinaveersaartitsinermi siunnersortitut A atorfeqartitaasimavoq. Atorfinititsinermi allakkiaq 7. juni 2000-imeersoq suliami allagaatinut ilaavoq, tassanngalu erserpoq:

”Tjenestemandinut atugassarititaasunut assingusunik atugassaqaartitsilluni misiliummik atorfinitsitsinermi allakkiaq.

K Kommunip 01. april 2000 aallarnerfigalugu pinaveersaartitsinermi siunnersortitut, tjenestemandinut atugassarititaasunut assingusunik atugassaqaartillutit atorfinitsippaatit.

Piffissaq misiliiviusoq 01. april 2002-imi naasutut isigineqassaaq.

...

Atorfinititsineq ilanngullugu nassiuqqartumi ”Soraarnerussutisiaqaartitsinngitsoorsinnaaneq pillugu ilisimatitsissut”-mi soraarnerussutisiaqaartitsinngitsoorsinnaanertut taaneqartut ilaatillugit pivooq.

...” (Atorfeqarfimmi nutsigaavoq.)

K Kommunimi Aningaasaqarnermut Ataatsimiititaliap ataatsimiinneranit nr. 07/01-imit imaqarniliaq 25. maj 2001-imeersoq suliami allagaatinut aamma ilaavoq:

”Imm. 7. j.nr. P-sag

...

Aalajangerneq.

Isumaginninnermut ataatsimiititaliamut siunnersuutigineqarpoq pitsaaliuinnermik siunnersorti periarfissatut kingullertut Unnuarianguit pillugit ajutoornerminik aaq-qiiinaqqullugu siorasaarneqassasoq atorfimminilu misilinneqarnera sivitsorneqassasoq.

...”

Aammattaaq K Kommunip aningaasaqarnermut ataatsimiititaliaanit isumaginninnermut ataatsimiititaliamut allakkat 28. maj 2001-imeersut suliami allagaatinut ilaapput, taakkunangalu erserpoq:

”Aningaasaqarnermut ataatsimiititaliap ataatsimiinnermini 07/-01-imi qaammatip matuma 25-anni pisumi A-p atorfinitsitaaneranut tunngasut oqaluuserisimavai, kingullermik Unnuarianguanik ingerlatsinermi ajutoorneq tunngavigalugu.

Aningaasaqarnermut ataatsimiititaliap isumaginninnermut ataatsimiititaliamut inassutigaa pinaveersaartitsinermi siunnersorti Unnuarianguanik ajutoorneq pissutigalugu periarfissatut kingullertut mianersoqqussummik tunineqassasoq, kiisalu atorfinitsinneqarnerani piffissaq misiliffiusoq sivitsorneqassasoq. ...” (Atorfeqarfimmi nutsigaavoq.)

Tamatuma kingorna A-p pinaveersaartitsinermi siunnersortitut sulinerup tapersorneqannginnera pillugu naammagittaalliuut ullulernerqarsimanngitsoq Isumaginninnermi Naalakkersuisumut Jørgen Wæver Johansenimut aamma K Kommunimi aningaasaqarnermut ataatsimiititaliamut nassiuppaa. Tassani ilaatigut imaattunik allassimasoqarpoq:

”Matumuuna naammagittaalliuutigissavara pinaveersaartitsinerup iluani taper-sorneqartannginneq pillugu naammagittaalliuut.

...

Suliat ataatsimiititaliamut akuerineqareernikut borgmesterip unitsittaarneranik assut uanga toqqissisimanartinngilara, saniatigullu oqaluttarluni allakkatigut ersaris-sumik saqqummiuttarlugit, suliakka qalliinnakkut ingerlanerartarlugit, taamaakkuni maani illoqarfitsinni pissutsinik malinnaasimangilaq.

Suliffiga nuannereqaara tapersorneqarnissara assut pisariaqartikkaluarpara, kisiat pissutsit taamatut ingerlajuartillugit suliat artornartut suliarisarlugit nukillaarsaataasaqaat, uannut tapersorneqartannginneq.

...”

Tulliullutik suliami allagaatinut ilaapput borgmesterip K Kommunimi aningaasaqarnermut ataatsimiititaliamut allagai 29. maj 2001-imeersut. Taakkunanga erserpoq:

”Pitsaaliuinnermut siunnersortimut tunngasoq – Sallu sallumik qalleqqissartuanguarlugu iluarsineqarneq ajorpoq putusaakkallu amerliartuinnartarlutik.

Isumaqarpunga suliami salluliornertaa tusaajumaneqarnerusoq iluarsisariaqarler-lunilu.

...

Asuli oqalunneq kipisariaqalerpoq isumaqartoqalerniaqinanili avataanut akuleruttuunngikkaluarlunga pissusipilunnik oqaluttuunneqarneq ajortunga.

...

Kissaatigaara aningaasaqarnermut ataatsimiititap ulloq 25. maj 2001-imi ataatsimiissutaani immikkoortoq 7 allakkat taamanikkut ilisimanngisakka tigoreerlugit suliareqqinneqassasoq, asulilu pinersuaq piffissaajaataajunnaarlunilu inernilerneqarumaartoq.

...”

Tulliulluni Aningaasaqarnermut Ataatsimiititaliap ataatsiminnerata nr. 08/01-ip imaqarniliorneqarnera 1. juni 2001-imeersoq suliame allagaatinut ilaavoq:

”Imm. 4. j.nr. P-sag

Pitsaaliuinermit siunnersorti A-p aningaasaqarnermut ataatsimiititaliamut pitsaaliuinermit siunnersortitut kommunimi suliame naammassiniarneranut akornusersuinerat maalaarutigaa.

Allakkat aammattaq Inunnik isumaginninnermut Naalakkersuisumut PAARISA-mullu nassiunneqarsimavoq.

Aalajangerneq.

Aningaasaqarnermut ataatsimiititaliap pisimasut akuersaaruminaatsippai. Aalajangerneqarpoq A aalajangiussamik allaffigineqassasoq atorfimmini misilitsinneqarfiata piffissalorneqarnera atorunnaarsinneqassasoq. Allakkiaq taanna A-llu akisutitut oqaaseqaatigisinnaasai Socialudvalgimut naammassisassatut nassiunneqasapput.”

K Kommunip A-mut allagai 5. juni 2001-imeersut suliame allagaatini tulliullutik ilaapput:

”Pineqartoq: Suliame illua'tungiusup isumaanik tusarniaaneq.

Aningaasaqarnermut ataatsimiititaliap kingullermik ataatsimiinnermini misiligitut atorfinitsitaanerit oqaluuserisimavaa, aalajangerlunilu tamatuma soraarsitaanerit kingunerissagaa.

Suliassat sularineqartarnerat pillugu inatsit aamma tjenestemandit pillugit malitarisassat malillugit tamatuma oqaaseqaateqarfiginissaanut periarfissaqassaait.

Taamaattumik pingasunngornermi 13. juni 2001-imi nal. 12.00 nallertinnagu oqaaseqaatinnik saqqummiusseqqullutit qinnuigineqarputit.” (Atorfeqarfimmi nutsigaavoq.)

A K Kommunimut 7. juni 2001-imi imatut allappoq:

”Suliame illua'tungiusup isumaanik tusarniaaneq pillugu kommunimit allakkat ti-guakka. Suliame illua'tungiusutut oqaaseqaateqassaguma pissutsit suut soraarsinneqarnissannik inassuteqarnermut tunngaviusut ilisimasariaqarpakka.” (Atorfeqarfimmi nutsigaavoq.)

K Kommunimi sulisoqarnermut pisortaq A-mut 7. juni 2001-imi imatut allappoq:

”Pineqartoq: Suliami illua’ tungiusup isumaanik tusarniaanermut akissutit.

Tjenestemandit pillugit inatsimmi 14. maj 1990-imeersumi § 30-mit erserpoq tjenestemandit soraarsinneqarsinnaasut qaammatinik pingasunik qaammatip naanisaanut periarfissaqartitaallutik. Tamatumunnga peqatigitillugu erseqqissarneqassaaq piffissami aalajangersimasumi misiligummik atorfinitsitaagavit, taamaattumillu piffissami aalajangersimasumi misiligummik atorfeqartitaanerpit atorunnaarsinnissaa-nut kommuni imminut pisinnaatippoq, tamannalu tassaavoq Aningaasaqarnermut Ataatsimiititaliap suliami matumani iliuuserilersaagaa, taamaattumillu allakkatigut siusinersukkut nassiunneqartutigut suliami illua’ tungiusutut isummannik tusarni-aavigineqarputit.

Erseqqissassavara kommunip isumaa malillugu tamatuma kingunerinngikkaa su-liami illua’ tungiusutut isumannik tusarniaavigineqarninni piffissaliussap allanngor-tinneqarnera.” (Atorfeqarfimmi nutsigaavoq.)

Tulliulluni suliami allagaatinut ilaavoq Perorsaasut Ilinniarsimasut Pe-qatigiiffiannit (matuma kingorna PIP-imik taaneqartartussamit) K Kommu-nimut telefax – tamatumunnga peqatigitillugu allakkatut nalinginnaasutut 8. juni 2001-imeersutut nassiunneqarsimasoq. Tassannga ilaatigut makku erserput:

”...

Soraarsitsiniarnerup tunuliaqutaa kommunip allaaserisariaqarpaa. Taamaattumik P.I.P.-p, A-p peqatigiiffittut attavigisaata, matumuuna qinnutigissavaa allakkatigut nutaatigut A soraarsitsiniarnerup tunngavigisaanik nalunaarfigineqassasoq. Taama-tuttaaq tusarniaanermi piffissaliunneqartup sivitsorneqarnissaa P.I.P.-p qinnutigissa-vaa.

...”

Tulliulluni suliami allagaatinut ilaavoq K Kommunip PIP-imut allakkat 13. juni 2001-imeersut telefaxikkut nassiussai, tamatumunnga peqatigitil-lugu allakkatut nalinginnaasutut nassiunneqarsimasut, taakkunangalu makku erserput:

”Pineqartoq: A.

Pinaveersaartitsinermi siunnersortip piffissami aalajangersimasumi misiligititut atorfinitsinneqarsimasup A-p atorfeqartitaaneranik kommunip atorunnaasitsissa-maarneminik allagai pillugit PIP-p saaffiginnissutaata 08. juni 2001-imeersup tigu-neqarnera K Kommunip matumuuna uppernarsassavaa.

K Kommunip suliassat suliarineqartarnerat pillugu inatsimmi § 6 tunngavigalugu nalunaarutigissavaa pinaveersaartitsinermi siunnersorti manna tikillugu atorfeqar-nermini pinaveersaartitsinermi siunnersortitut atorfik sulisitsisuminut naammagi-nartumik ingerlassinnaallugu takutissimanngikkaa. Taamaalilluni kimeqarluartumik avammut sammivilimmik pikkorissuseqartumillu suliniuteqarsimanngilaq.

Kommunip qinikkatut aqutsinermilu allaffissornikkut pisortat akornanni isuma-qatigiissutigineqarpoq ataatsimoortumik naliliineq aallaavigalugu A inuk taannaan-ngitsoq atorfirmik kommunimut pingaarutilimmik taassuminnga aallussisinnaasoq. Taamaattumik K Kommunip innersuussutigissavaa pinaveersaartitsinermi siunner-sortip suleqatigisartagaasa oqaatigimassuk isumaqarlutik pineqartoq atorfirmut piukkunnaatinik pisariaqartunik pigisaqanngitsoq.

Taamaattumik misiligummik piffissami aalajangersimasumi atorfinitsitsineq kommunip malittarisassat atuuttut malillugit atorunnaarsissamaarpaa.

Tamatumunnga peqatigitillugu K Kommunip tusarniaanermut akissuteqarnissamut piffissaliunneqartoq qaammatip matuma 23-annut kinguartissavaa.” (Atorfeqarfimmi nutsigaavoq.)

Tusarniaanermut akissuteqarnissamut piffissaliussap kinguartinneqarnera A-mut nalunaarutigineqarsimanersoq takuneqarsinnaanngilaq, kiisalu A-p imaluunniit PIP-p akissutaanik takkuttoqarsimanagera aamma takuneqarsinnaanani.

Tulliulluni suliami allagaatinut ilaapput Isumaginninnermut Immikkoortortaqarfimmit K Kommunimi Aningaasaqarnermut Ataatsimiititaliamut allakkat 26. juni 2001-imeersut, imaattut:

”Pineqartoq: Pinaveersaartitsinemi siunnersorti A.

Isumaginninnermut Ataatsimiititaliaq sulittaasup ullumikkut aalajangiineratigut aalajangerpoq A-p atorfeqartitaanerata 30. sept. 2001 aallartiffigalugu atorunnaarsinneqarnissaa inassutiginiarlugu.” (Atorfeqarfimmi nutsigaavoq.)

Tamatuma kingorna suliami allagaatinut ilaavoq telefax K Kommunip PIP-mut telefaxikkut nassiussimasaa – aamma allakkatut nassiunneqarsimasooq – 5. juli 2001-imeersooq:

”Pineqartoq: A.

PIP-mut allakkat K Kommunip akissummik tigusaqarfigisimanngisai ilanngullugit nassiuteqqinneqarput.

A-p sulinngiffeqarnera pissutigalugu K Kommuni suliami iliuseqaqqissimanngilaq, allakkatigullu ukunatigut PIP periarfisseqqissallugu suliaq pillugu 10. juli 2001-ip tungaanut oqaaseqaateqarnissaanut, A-mi ulloq taanna sulinngiffeqarnerminit utersimassasooq naatsorsuutigineqarmat.” (Atorfeqarfimmi nutsigaavoq.)

Allakkat taakku A-mut nassiunneqarsimanersut aamma takuneqarsinnaanngilaq, taamatuttaarlu A-mit imalulunniit PIP-imit akissummik nassaasaqarnani.

Kiisalu kommunip allattoqarfianit allakkat 11. juli 2001-imeersut suliami allagaatinut ilaapput, taakkunanngalu erserpoq:

”Pineqartoq: Qaammatinik pingasunik piffissaqartitsilluni soraarsitsineq.

Suliami illua'tungiusup isumaanik tusarniaasoqareersoq, kiisalu isumaginninnermik ingerlatsivik inassuteqaateqareersoq matumuuna nalunaarfigissavakkat K Kommunip ajuusaarutigalugu nalunaarfigisariaqaraatit qaammatinik pingasunik piffissaqartitaallutit qaammatip naaneranut soraarsitaasutit. Taamaattumik nalunaarfigissavakkat ulloq suliffiit kingulleq tassaassammat 31. oktober 2001.

K Kommunip soraarsitsinermit tunngavilersuutigaa qinikkat aqutsisullu isumaqarmata pinaveersaartitsinermi siunnersortitut manna tikillugu atorfeqartitaaninni pinaveersaartitsinermi siunnersortitut atorfiup ingerlannissaanut ingerlatsisinnaanermut pisinnaasaqassutsimik K Kommunip akuersaarsinnaasaanik takutitsisimanngitsutit.” (Atorfeqarfimmi nutsigaavoq.)

K Kommunimut 22. august 2001-imi allappunga kommunip soraarsitsineranik tamatumunngalu atatillugu kommunip suliamik suliarinninneranik A-p naammagittaalliuutaa suliariniarlugu aalajangertunga. Allakkatigut taakkunuuna kommuni qinnuigaara naammagittaalliuut pillugu oqaaseqaateqaqqullugu kiisalu mappi allagaatinik A-mut tunngasunik imalik atukkiuteqqullugu.

Mappi allagaatinik A-mut tunngasunik imalik K Kommunip 13. september 2001-imi nassiuppaa, tamatumunngalu peqatigitillugu imatut akissuteqarluni:

”Suliami allagaatit qulaani taaneqartumut tunngasut ilanngullugit matumuuna nassiunneqarput. A-mut allakkat/ilisimatitsissutit suliami allagaatinik takuneqarsinnaapput, ullulernerqarnerilu malillugit tulleriiaagaallutik.

K Kommuni isumaqarluinnarpoq malittarisassat suliassat suliarineqartarnerat pillugu inatsimmi maleqquneqartut K Kommunip malissimagai, tassa imaappoq Aningaasaqarnermut Ataatsimiititaliap soraarsitsinissaq pillugu inaarutaasumik aalajangiinginnerani suliami illua'tungiusup isumaanik tusarniaasoqarsimasoq. Aammattaaq soraarsitsinermit tunngavilersuutaasoq PIP-imut nassiunneqarsimavoq, taassumami suliaq 08. juni 2001 aallarnerfigalugu ingerlatilermagu. Taamaattorli taanna akissuteqarsimangilaq, naak arlaleriarluni nukingisaarneqartarsimagaluarluni, soorlu tamanna suliami allagaatinik ersertoq.

Tamatumunnga peqatigitillugu K Kommunip ilisimatitsissutigissavaa A tjenestemandinut atugassarititaasunut assingusunik atugassaqtitaalluni misiligummik atorfeqartitaammat. Tamanna atorfinitsitsinermit allakkiamit erserpoq.

...” (Atorfeqarfimmi nutsigaavoq.)

A-mut 21. september 2001-imi allappunga, qinnuigalugulu K Kommunip akissutaa pillugu oqaaseqaatissaqaruni taakku uannut nalunaarutigeqqullugit.

A 25. september 2001-imi tamatumunnga akissuteqarpoq:

”Pineqartoq: Naammagittaalliuutiga.

Soraarsitsineq pillugu suliffinnit tusakkakka imaapput.

Borgmesteriugallartoq oqaloqatigakku oqarpoq maani K Kommunimi pinaveersaartitsinermit siunnersortimut aningaasassarussimasoq, taamaattumillu maani kommunimit soraarsitaanera atsiorsimallugu.

Maani K Kommunimi aviisi nuna tamakkerlugu saqqummersittagaq aqqutigalugu pinaveersaartitsinermit siunnersortissarsiorput. Tamanna pakatsissutigeqaara, oqalluttuumannigami atorfimmu tassunga aningaasassaruttoq...” (Atorfeqarfimmi nutsigaavoq.)

K Kommuni 27. oktober 2001-imi qinnuigaara kommuni A-p akissutaa-nut oqaaseqaatissaqarpat taakku uannut nalunaarutigeqqullugit.

K Kommuni 23. november 2001-imi imatut akissuteqarpoq:

”Pineqartoq: A-p naammagittaalliuutaa.

K Kommunip nalunaarutigissavaa K Kommuni saqqummiunneqartunut amerlanerusunik oqaaseqaatissaqanngitsoq, tassami suliaq taanna pillugu siusinnerusukkat akissutaasimasut innersuussutigineqarmata.

Qulaani taaneqartup soraarsinneqarneranut tunngavilersuut K Kommunip erseqqissumik oqaatigisimavaa, tamannalu pillugu amerlanerusunik oqaaseqaatissaqarnani.

...” (Atorfeqarfimmi nutsigaavoq.)

Tamakku tunngavigalugit imaattunik oqaaseqaateqarsimavunga:

”Suliami illua tungiusup isumaanik tusarniaaneq

K Kommunip A-mik soraarsitsineranut inatsisitigut tunngavissarpiaasoq tassaavoq Kalaallit Nunaanni Namminersornerullutik Oqartussani kommuninilu tjenestemandit pillugit Inatsisartut inatsisaanni (tjenestemandit pillugit inatsimmi) nr. 5-imi, 14. maj 1990-imeersumi § 32, imm. 1, tassanilu imaattunik allassimasoqarpoq:

”Tjenestemandip tamatumunnga qinnuteqanngikkaluarluni soraarsitaannginnerani, pisartut § 31-mi taaneqartut pinnagit, atorfillit peqatigiiffissuat attaviusoq tjenestemandillu nammineq oqaaseqaateqarnissaminnut pisinnaatinneqassapput §§ 21-25 naapertorlugit killisiuineqarsimangippat.”

Pisortani atorfeqartitaasup soraarsinneqarnissaanik imaluunniit allatigut iliuuseqarfigineqarnissaanik aalajangiineq suliaasat suliarineqartarnerat pillugu inatsit tunngavigalugu aalajangiineruvoq, taamaattumillu oqartussaasut sulianik suliarinnittarnerat pillugu inatsisini malittarissasani tunngavinnilu inatsisini aalajangersagaanngitsuni pineqartunut ilaattinneqarlutik, oqartussaasut aalajangiinerini allani pisarnertut.

Suliaasat suliarineqartarnerat pillugu inatsimmi § 19, imm. 1 imaattunik oqaasertaqarpoq:

”Suliasami (illuatungiulluni) peqataasoq paasissutissanik aalajangersimasunik suliasami pisimasuinnut tunngasunik oqartussaasut pigisaqarnerannik ilisimasaqarsorinangippat aalajangiisoqassanngilaq, peqataasoq taanna paasissutissanik tamakkuninnga oqartussaasunit ilisimatinneqartinnagu oqaaseqaateqarnissaanullu periarfissinneqartinnagu. Aalajangigarli taanna aatsaat atortuussaaq paasissutissat peqataasumut tassunga iluaqutaasussaangippata suliallu aalajangiiffiginisnaanut pingaaruteqarpata. Oqartussaasut oqaaseqaateqarnissamut taaneqartumut piffissamik killiliisinnaapput.”

Tamatuma saniatigut pisortani atorfeqartitaasunik soraarsitsinermi suliami illua tungiusup isumaanik tusarniaanissamut annertunerusumik pisussaaffik eqqartuussisarnermi periaaseq aalajangersimasoq malillugu atuuppoq. Tusarniaanissamut annertunerusumik pisussaaffik taanna – aalajangiisoqannginnerani – oqartussaasup paasinninneranik atorfeqartitaasumut nassuiaanissamut pisussaaffimmik nassataqarpoq, matumani

pissusiviusut inatsisitigut nassatarisaat aamma ilanngullugit eqqarsaatigalugit.

Tunngaviuttipara kommunimi pinaveersaartitsinermi siunnersortitut sulinini pillugu A-p tulleriinneri malillugit aningaasaqarnermut ataatsimiititaliamut kiisalu Isumaginninnermut Naalakkersuisumut saaffiginnissimanera pissutigalugu K Kommunip A soraarsissimagaa. Taamatut aalajangiineq aningaasaqarnermut ataatsimiititaliap 1. juni 2001-imi ataatsimiinnerani pivoq, saaffiginnissullu taaneqartoq pissutigalugu pisimasutut illuni. Taamaalilluni ataatsimiinnerup imaqarniliorneqarneranit erserpoq A-p naammagittaalliummik ilaatigut Isumaginninnermut Naalakkersuisumut nassitsisimanerata oqaatigineqarnerata kingorna aningaasaqarnermut ataatsimiititaliap "pisimasut akueriuminaatsikkai".

Taamaalilluni K Kommunip allakkat 5. juni 2001-imeersut qulaani issuarneqartut A-mut nassiuppai, taakkunanilu A qinnuigineqarluni kommunip aningaasaqarnermut ataatsimiititaliaata misiligutitut atorfinitsitsinerup "atorunnaasinniarneqarnissaata anguniarneqarnissaanik" aalajangernera oqaaseqaateqarfigeqqullugu.

A-p pissutsit soraarsinneqarnissaminik inassuteqaateqarnermut tunngavilersuutigineqartut itisilerneqarnissaat 6. juni 2001-imi qinnutigaa. Kommuni 7. juni 2001-imi akissuteqarluni tjenestemandit pillugit inatsimmi § 30, kiisalu A-p misiligutaasumik atorfeqartitaanera aamma misiligutaasumik atorfeqartitsinermik kommunip atorunnaarsitsinissaminut pisinnaatitaanera innersuussutigai.

PIP K Kommunimut 8. juni 2001-imi saaffiginnippoq: Peqatigiiffik ilaatigut allappoq soraarsitsiniarnerup tunuliaqutaa kommunip tunngavilersortariaqaraa, qinnutigalugulu A allakkatigut nutaatigut soraarsitsiniarnermut tunngaviusoq pillugu nalunaarfingineqassasoq.

Tamatuma kingorna K Kommuni PIP-mut ilaatigut allappoq A pinaveersaartitsinermi atorfiup ingerlannissaanut pisinnaasaqassutsimik takutitsisimanngitsoq, K Kommunillu soraarsitsineq pillugu allakkamini 11. juni 2001-imeersuni soraarsitsineq A-mut imatut oqaatigaa:

"K Kommunip soraarsitsinermit tunngavilersuutigaa qinikkat aqutsisullu isumaqarmata pinaveersaartitsinermi siunnersortitut manna tikillugu atorfeqartitaaninni pinaveersaartitsinermi siunnersortitut atorfiup ingerlassinnaanissaanut pisinnaasaqassutsimik K Kommunip akuersaarsinnaasaanik takutitsisimanngitsutit."

K Kommunip allagai 13. juni 2001-imeersut A-mut aamma nassiunneqarsimanersut imaluunniit allakkat taakku PIP-p A-mut ingerlateqqissimanagerai suliamit ersinngilaq. Taamatuttaarlu A-p soraarsinneqarnissaa kommunip sooq kissaatigineeraa K Kommunip A-mut allagaanit qulaani issuarneqartunit ersinngilaq.

A aamma PIP soraarsitsiniarnermut tunngavilersuisoqarnissaanik qinnuteqaraluarataluunniit K Kommuni pissusiviusut kommunip paasinninera malillugu A-p soraarsinneqarneranik kinguneqartariaqartut pillugit

erseqqinnerusunik nassuiaateqanngilaq. Aatsaat soraarsitsineq pillugu allakkani namminerni K Kommuni A-p soraarsinneqarnera pillugu tunngavilersuuteqarpoq.

Isumaqarpungalu soraarsitsinermut tunngavilersuut K Kommunimi aningaasaqarnermut ataatsimiititaliap ataatsimiinnerani imaqarniliamit 29. maj 2001-imeersumit ersertoq tunngavilersuummut kommunip A-mik soraarsitsineq pillugu allagaani 11. juli 2001-imeersuni oqaatigineqartumut sanilliukkaanni taakku akornanni imminnut naapertuutinnginneqartoq.

Tamanna tunngavigalugu isumaqarpunga tunngavilersuut kommunip soraarsitsinermut tunngaviginiagaa pillugu oqaaseqaateqarnissaminut A soraarsinneqarnini sioqqullugu periarfissaqartinneqarsimanngitsoq.

PIP-p peqatigiiffittut A-p ilasortaaffigisaatut soraarsitsiniarnermut tunngavilersuutip ilaanik nassinneqarnerata, tak. allakkat 13. juni 2001-imeersut qulaani issuarneqartut 5. juli 2001-imilu nassiuteqqinneqartut tamanna allangortinngilaat, tassami siullermik tjenestemandit pillugit inatsimmi aalajangersakkat qulaani taaneqartut malillugit kattuffiup ilasortaavigisap tjenestemandillu nammineq oqaaseqaateqarnissamut periarfissaqartinneqarnissaannut pisussaaffik atuummat.

Tamatuma nassataraa K Kommunip PIP-muinnaq imaluunniit A-muinnaq soraarsitsiniarneq pillugu oqaaseqaateqartitsinissani kisiat pisussaaffinngikkaa. Tulliulluni suliami illua tungiusumut sinniisuunerup nassatarinngilaa aalajangersakkannik suliami illua tungiusunut aalajangersimasunik pisinnaatitaaffiliisunik oqartussaasup saneqqutsinissaminut pisinnaatitaanera. A nammineq sulisutut suliami imminut tunngasumi illua tungiuvoq, taamaattumillu peqatigiiffiup pineqartup ilasortaaffigissaata suliami pineqartumut tunngasumi tusarniaavigineqarnera pineqartup suliami illua tungiusutut tusarniaavigineqannginneranut aaqqiissutigineqarsinnaanngilaq.

PIP-p saaffiginnissutaani K Kommunip soraarsitsiniarneq pillugu A-mut tunngavilersuinissaata qinnugitineqarsimanera isiginiarlugu K Kommunip kommunip soraarsitsiniarnerminut tunngavigisaa pillugu tunngavilersuummik A-mut nassiussaqaqarnani taamaallaat PIP-imut nassiussaqaqarnera isorisariaqartutut isigaara.

Tamatuma kingorna isumaqarpunga K Kommunip suliamik suliarinninera amigartuusimasoq, tassami A-p soraarsinneqannginnerani suliami illua tungiusup isumaanik pissusissaq malillugu tusarniaasoqarsimanngitsoq. Suliami illua tungiusup isumaanik tusarniaasarneq pillugu malittarisassat aalajangiinerup eqqortuuneranut annertuumik pingaaruteqarnerat isiginiarlugu isumaqarpunga K Kommunip A-mik soraarsitsinera atuussinnaassuseqanngitsoq, K Kommunilu qinnuigaara kommuni tamatumunga atatillugu qanoq iliuuseqalersaarnersoq nalunaarfigeqqullunga.

Tunngavilersuineq

Suliassat suliarineqartarnerat pillugu inatsimmi § 22-mi aalajangersarneqarpoq pisortani oqartussaasup aalajangiinera allakkatigut nalunaaru-

tigineqaruni tunngavilersuummik ilaqartinneqassasoq, aalajangiineq suli-ami illua tungiusumut pineqartumut tapersiisuulluinnangippat.

Inatsimmi tassani § 24, imm. 2-mi aalajangersarneqarpoq tunngavilersuummi paasissutissat suli-ami pissusiviusunut tunngasut aalajangiinermi annertuumik pingaartinneqartut pisariaqarpat naatsumik aamma erseqqissarneqassasut.

Tjenestemandit pillugit inatsimmi § 32, imm. 2-mit makku erserput:

”Kialuunniit qinnuteqaqqaarnani soraarsinneqartup soraarsinneqarnermini pis-sutaasunik allaganngorlugu nassuiaateqartinneqarnissani piumasarisinnaavaa.”

Inatsileriffiup suliassat suliarineqartarnerat pillugu inatsit pillugu ilit-sersuusuaanit makku erserput:

”130. Tunngavilersuummi takuneqarsinnaassaaq nassuiaat aalajangiineq suna pillugu taama imaqarnersoq paasissutissiisoq.”

K Kommunip A 11. juli 2001-imi soraarsimmagu tamanna imaattumik tunngavilersuuteqarluni pivoq:

”K Kommunip soraarsitsinermit tunngavilersuutigaa qinikkat aqutsisullu isuma-qarmata pinaveersaartitsinermi siunnersortitut manna tikillugu atorfeqartitaaninni pinaveersaartitsinermi siunnersortitut atorfiup ingerlannissaanut ingerlatsinnaa-nermit pisinnaasaqassutsimik K Kommunip akuersaarsinnaasaanik takutitsisiman-ngitsutit.”

Kommuni A-mik soraarsitsinerminut tunngavilersuummini taamaallaat oqarpoq A sulinermit ingerlannissaanut pisinnaasaqassutsimik kommunip akuerisinnaasaanik takutitsisimanngitsoq. Taamatut oqarneq nassuiaam-mik erseqqinnerusumik itisiliisumilluunniit ilaqartinneqanngilaq, taama-tuttaarlu allakkani soraarsitsissutaasuni pissusiviusut kiisalu inatsisini malittarisassat aalajangiinermi tunngavigineqartut innersuussutigineqar-natik.

Taamaattumik A-mik soraarsitsineq aalajangiinerup taamaattup kom-munip paasinninnera malillugu sooq pisariaqarsimanera pillugu nassui-aativittut iluseqanngilaq, taamaalillunilu soraarsitsineq pillugu tunngavi-lersuut isiginiakkat isumaliutersuutillu aalajangiinermi tunngaviutinne-qartorpiaasimasut pillugit nassuiaammik erseqqinnerusumik imaqarnani.

*Taamaattumik qulaani taaneqartut isiginiarlugit aamma isumaqarpu-nga K Kommunip A-mik soraarsitsinerminut tunngavilersuutaa amigaate-qartuusooq. Tamanna isorisariaqartutut isigaara, K Kommunilu qinnuigaa-
ra qulaani taaneqartut qanoq iliuuseqarnissamut pissutissaqalersitsinersut nalunaarfigeqqullunga.*

Oqaaseqaatika allat:

Aammattaaq K Kommunip suliami matumani uppersaasersuina amigaarteqartut isikkoqartoq oqaatigissallugu pissutissaqarpunga, tassami suliami A-p soraarsinneqarneranut tunngavisoq pillugu uppersaatsinik takussutissaqanngimmat.

Ingerlatsinermi oqartussaasunut nalinginnaasumik piumasaqaataavoq suliasat aalajangersimasut aalajangiivigineqartussat oqartussaasumit suliarineqartussat illersorneqarsinnaasumik paasissutissartalersorneqarnissaat akisussaaffigissagaat. Tamatuma ilaatigut nassataraa oqartussaasup suliani suliarisimasamini paasissutissat pisariaqartut pissarsiarisimallugit uppersaarsinnaassagaa. Sulianik uppersaasersuisarneq pillugu tunngavisoq aamma pingaaruteqarpoq, suliap uppersaasersugaanera isumaqatigiinngissutaalissagaluarpat, matumani assersuutigalugu oqartussaasup atorfeqartinneqartoq tunngavik suliamut attuumassuteqartoq tunngavigalugu soraarsissimaneraa taamaalioersimanningersorluunniit pillugu apeqqtut aamma ilanngullugu eqqarsaatigalugu.

K Kommunip suliami matumani suliap uppersaasersorneqarnissainik oqartussaasunut piumasaqaataasunik eqqortitsisimanninnera isorisariaqartutut isigaara.

Kiisalu oqaatigissallugu tulluartauppara soraarsitsinermit malittarisassat nalinginnaasut misiligummik atorfeqartitaasunik soraarsitsinermi aamma atorineqartarmata. Taamaalilluni misiligummik atorfeqartitaanermit piffissarititassup naanerata atorfeqartitsinerup kipitinneqarnissaanut periarfissaq nassatarinngilaa. K Kommunilli allagai 7. juni 2001-imeersut tjestemandimik naliliinikkut soraarsitsinissamut periarfissap A-p misiligummik atorfeqartitaanerata atorunnaarnissaa pillugu apeqqummut kaputartuussinermit imaqartutut ippit.

Ingerlatsinermi oqartussaasut soraarsitsisarneri ingerlatsinermit inatsiseqartitsinermit malittarisassani tunngavisoq ilaatinneqarput, taamaalilluni piumasaqaataavoq naliliinikkut soraarsitsinerni nalinginnaasunik atugassaqartitaalutik atorfeqartitaasut aamma misiligummik atorfeqartitaasut assigiinngitsumik pineqassanngitsut.

Taamaattumik pitsaanngitsutut isigaara K Kommunip allagai qulaani isuarneqartut isumaqalersitsinnaasimmata kommunip A-mik soraarsitsinermini tjestemandit pillugit inatsimmi aalajangersakkat malillugit naliliinikkut soraarsitsineq imaluunniit misiligutitut atorfeqartitsinerup naanera taamatut tunngaveqarluni soraarsitsineq kommunip nammineq toqarsinnaagai.”

Kommunimit tusagaqannginnama suliasaq allakkani 27. september 2002-meersuni aamma 27. november 2002-meersuni eqqaasitsissutigisimavara.

K Kommuni allakkani 18. december 2002-meersuni, 27. december 2002-mi tigusimasanni, ima akissuteqarpoq:

”Siullermik taama kingusitsigisumik akissuteqarneq ajuusaarutigissavara, imaatulli oqaatigissallugit:

Allakkani 14. november 2002-mi allagaasuni Ombudsmandi isumaqarpoq A-p soraarsinneqarneranut tunngavilersuut piumasarisani, suliassat suliarineqartarnerat pillugu inatsimmi piumasarineqartunik, naammassinninngitsoq. K Kommunip matumunnga nalunaarutigissavaa naliliineq taanna isumaqatigineqanngitsoq, taamatullu tunngavilersuut, soraarsitsinermi oqaatigineqartoq, K Kommunip taamaassorinnivinnera malillugu piumasarisani suliassat suliarineqartarnerat pillugu inatsimmiitunik naammassinnittuusooq.

Aammattaaq Ombudsmandip ersersippaa suliame tassani K Kommuni suliame ilua’ tungiulluni peqataasup isumaanik tusarniaanermi naammaginangitsumik tusarniaasimasooq, tamannalu K Kommunip isumaqatiginngilaa, tassanili oqaatigineqartut tusaatissatut tigullugit.

Naak K Kommunip soraarsitsinermi piffissarititaasut eqquutitissimagaluarai akissaasersuinerlu soraarsitsinermi piffissarititaasup iluani pisimagaluartoq, tamanna eqqartuussivik aqutiginagu isumaqatigiissuteqarnissaq, manna tikillugu akueriumanngisaa, pillugu K Kommunimit A-mut saaffiginninnermut pissutaasimavoq. Taamaattorli K Kommunip eqqartuussivik avaqqullugu aalajangiiviginninniarnissaq sulii ataasiarluni misileqqinniarpa.”

Suliap suliarinera ukiup nalunaarusiuunneqartup naanerani inaarlugi suliarisimanngilara.